

謝恩表

臣旭十二月二十八日江州差來報孔目官周預賚到官誥一道伏蒙

聖恩特授臣將仕郎守本州助教者臣旭聞乾坤佈惠里閭生光豈知蒲柳之年獲被絲綸之命臣旭誠惶誠忭竊念臣世非蟬冕業謝箕裘以祖先守孝弟之規子孫秉詩書之訓始從唐室逮至

聖朝建旌表之門闥復蠲除於科役是以聚族三千餘口幸免支分生身八十餘年曾無玷累但喜逢於清世何敢忘於

皇恩伏惟崇文廣武大德宏仁佩服洪恩實深欽感仰荷
聖朝仁孝皇帝陛下道邁羲黃功高舜禹爰自禮行睢上慶洽
寰中生靈並荷夫殊休品物悉蒙其沛澤臣家敦雍睦齒近期
頃特頒庠序之資俾預衣冠之列華門圭竇驚紫誥以俄臨
雪鬢霜髯映綠袍而共耀此蓋

陛下曲成小善以彰大化敢不彌敦禮義以勵節操上副
國朝之教下酬宰輔之功臣伏恨老耄不獲奔趨舞蹈

闕廷無任瞻天荷聖戰汗激切屏營之至謹奉表稱謝以聞

大中祥符元年辛亥十一月 日